

दिनांक : 17.05.2026

समय : 18.45 बजे

आकाशवाणी जयपुर—अजमेर
प्रादेशिक समाचार

- प्रधानमंत्री नरेन्द्र मोदी आज स्वीडन रा प्रधानमंत्री उल्फ क्रिस्टर्सन रे साथै कारोबार अर रक्षा समेत दूजा हलका मांय आपसी सहयोग माथे बतळ करेलां
- केन्द्रीय गृह मंत्री अमित शाह आर्टिफिशिएल इंटेलिजेंस अर डीप टेक्नोलॉजी ने भविष्य री माली बन्दोवस्त रो खास आधार बतायां
- उपमुख्यमंत्री दिया कुमारी लोगां ऊँ ईंधन बचत मुहिम मांय भागीदारी तैय करण री अरज करीं अर
- विश्व रक्तचाप दिवस रे मौके न्यारी—न्यारी ठौड़ा जनजागरूकता कार्यक्रम अर स्वास्थ्य जांच शिविर लगायी ज्यां

000

प्रधानमंत्री नरेन्द्र मोदी स्वीडन री दो दिन री जात्रा माथे कुछ देर पैला गोथेनबर्ग पूगयां हवाई अड्डा माथे स्वीडन रा प्रधानमंत्री श्री उल्फ क्रिस्टर्सन प्रधानमंत्री श्री मोदी री अगुवाई करीं प्रधानमंत्री श्री मोदी स्वीडन प्रधानमंत्री रे साथै करोबार, तकनीक, आर्टिफिशियल इंटेलिजेंस ए.आई., प्रौद्योगिकी, स्टार्ट—अप्स, सप्लाई कड़ी, रक्षा, अंतरिक्ष, जलवायु परिवर्तन नियंत्रण माथे बतळ करेलां दोन्यू नेता यूरोपीय आयोग री अध्यक्ष सुश्री उर्सुला फॉन डेर लॉयन रे साथै यूरोपीय उद्योग गोलमेज सम्मेलन मांय ई बोलेलां आ प्रधानमंत्री श्री मोदी री संयुक्त अरब अमीरात अर यूरोप जात्रा रो तीजो चरण हैं वटे ई काले आप री जातरा रा दूजा चरण मांय भारत अर नीदरलैंड्स आप रा हितां ने सामरिक थर माथे ले जा र 17 करार कर्यां

000

केन्द्रीय गृह मंत्री अमित शाह कह्यो है के आर्टिफिशिएल इंटेलिजेंस ए.आई. अर डीप टेक्नोलॉजी ई भविष्य री माली बन्दोवस्त रो खास आधार व्हेलां आज अहमदाबाद मांय, मिलियन माइंड्स टेक पार्क रा पहला चरण अर ग्रेमी सिटी कैंपस रो उद्घाटन करता वणा कह्यो के भारत दुनिया रा हर उभरता हलका मांय अगवा बण ग्यो हैं

.....

000

लोकसभा अध्यक्ष ओम बिरला आज आप रा संसदीय हलका कोटा—बूंदी रा दौरा माथे पूग्यां वणा कोटा मांय भीम राजपूत हॉस्टल मांय राजमाता शिव कुमारी बालिका हॉस्टल री नीव धरीं ई मौके श्री बिरला कह्यो के शिक्षा ऊँ ई समाज मांय सकारात्मक बदलाव लायो जा सके हैं वणा बालिका शिक्षा रा प्रसार सारू खास कोशिश करण माथे जोर दियो

.....

000

राज्यपाल हरिभाऊ बागड़े प्रशासनिक ओहदा माथे चुणी ज्या अहलकारा ऊँ पिछड़ा अर कमजोर तबका रा लोगां री समस्यावां ने निपटावण सारू खास ध्यान राखण री बात कही हैं वणा गांव अर गरीब लोगां सारू काम करणो नुवा भारत ने बणावण री प्राथमिकता बतायां राज्यपाल श्री बागड़े आज जयपुर मांय प्रतिभा सम्मान जळसा मांय बोल रिया हां ई कार्यक्रम मांय भारतीय प्रशासनिक सेवा रा तीन नुवा चुणी ज्या अहलकारां अर राजस्थान प्रशासनिक सेवा परिषद रा 59 नुवा नियुक्त अहलकारां रो सम्मान करी ज्यां

राज्यपाल आखिरी छेड़ा रा मिनख री आवाज सुण ने अर चुणी ज्या जण नुमाइन्दा रे साथै चोखो व्यवहार करण री अरज करीं

000

देश रा भारतीय प्रौद्योगिकी संस्थानां मांय भर्ती सारू होवण वाळी जेईई एडवांस परीक्षा-2026 रो आज आयोजन करी ज्यों इण मांय जेईई मेन्स मांय कामयाब रहवण वाळा अढाई लाख पढेसर भेळा व्ह्यां आईआईटी रुडकी कानी ऊँ आ परीक्षा करायी ज्यी हीं कम्प्यूटर री मार्फत आ परीक्षा दो पारिया मांय व्हीं

000

केन्द्र सरकार चांदी रा आयात माथे रोक लगा दी हैं विदेश व्यापार महानिदेशालय कानी ऊँ जारी अधिसूचना मुजब चांदी ने केई वर्गा री फी सूची हटा र रो वाळी सूची मांय डाल दीरीज्या हैं आ पाबंदियां रे कारण अबै बिना सरकारी मंजूरी रे कोई आयातक या जेवरात कारोबारी विदेश ऊँ चांदी रो आयात नी कर सकेला गैर जरूरी आयात ने कम करण अर विदेशी मुद्रा रा खर्च माथे लगाम लगावण सारू ओ कदम उठायी ज्यो हैं

000

प्रधानमंत्री नरेन्द्र मोदी अर मुख्यमंत्री भजन लाल शर्मा री ईंधन बचावण री मुहीम मांय जन नुमाइन्दा, अहलकार अर लोग आप री भागीदारी तैय कर रिया हैं ई कडी मांय उपमुख्यमंत्री दिया कुमारी आज जयपुर ऊँ अजमेर रो सफर रेलगाडी ऊँ पूरो कर्यों ई दौरान वणा जातरुआ रे सागे बतळ कर ने सार्वजनिक ट्रांसपोर्ट अपणावण री अरज करीं

.....

केन्द्रीय मंत्री अर्जुनराम मेघवाल ई बीकानेर रेलवे टेशन ऊँ आप रा रहवास तांई रो सफर ई-रिक्शा ऊँ तैय कर ईंधन बचावण रो संदेश दियों संसदीय कार्य मंत्री जोगाराम पटेल ई आज जोधपुर मांय लोगां ऊँ पेट्रोल-डीजल ने किफायती काम मांय लेवण री अरज करीं

000

मुख्य सचिव वी. श्रीनिवास ने आज आमेर महल ने देख्यां वणा महल परिसर मांय चाल रह्या विकास अर संरक्षण रा कामां रो जायजो लियों सैलाणियां री बधती आवक ने देखता मुख्य सचिव आमेर तांई पूगण वाळा मार्गां ने ओर बेहतर बणावण रा निर्देश दिया वणा डिजिटल संग्रहालय अर गाइड सिखावण ने ले र ई अहलकारां ने जरूरी निर्देश दिया ई दौरान पुरातत्व महकमां रा निदेशक डॉ. पंकज अर आमेर महल अधीक्षक डॉ. राकेश ई मौजूद रियां

.....

000

हर साल 18 मई ने अन्तर्राष्ट्रीय संग्रहालय दिवस मनायो जावे हैं इण रो मकसद संग्रहालयां री मार्फत सांस्कृतिक लेण-देण अर आपसी समझ ने बधावो देवणो हैं ई मौके राज्य रा सगळा संग्रहालयां अर स्मारकां मांय आवण वाळा सगळा सारू प्रवेश मुफ्त राख्यी ज्यो हैं वटे ई इण ऊँ एक दिन पैला आज जयपुर मांय हैरीटेज टैम्पल वॉक राख्यी ज्यों इण री मार्फत शहर री धार्मिक अर सांस्कृतिक धरोहर प्रति जाग जगावण अर उण रा संरक्षण रो संदेश दीरीज्यों

000

कोटा मांय प्रसूतावां री मौत अर किडनी फेल होवण रा मामला मांय काले दिल्ली एम्स री टीम कोटा रो दौरा कर्यों इण री जांच रपट अबै पेश करी जायेलां ई बीचे अजै तांई 16 ऊँ बत्ती महिलावां री किडनी खराब होवण रा मामला सामी आ चुक्या हैं आज न्यू मेडिकल कालेज अस्पताल मांय भर्ती एक और प्रसूता ईलाज रे दौरान दम तोड दियों ई रहस्यवाळी संकमण ऊँ अजै तांई पांच प्रसूतावां री मौत व्हे चुकी हैं

000

आज विश्व रक्तचाप दिवस रे मौके प्रदेश मांय न्यारा-न्यारा ठौडां जागरूकता कार्यक्रम अर स्वास्थ्य जांच शिविर लगायी ज्यां आं मांय विशेषज्ञ लोगां रा ब्लडप्रेसर री जांच करी अर इण ऊँ होवण वाळा नुकसाण रा बारा मांय जाणकारी दीं ई कडी मांय झुन्झुनू रा बीडीके अस्पताल मांय शिविर लगायी ज्यों

ई मौके पीएमओ डॉ. जितेन्द्र भाम्बू लोगां ने बीपी ऊँ होवण वाळा बुरा नतीजा री जाणकारी दीं वणा कह्यो के बगत माथे ईलाज नी करावण माथे इण ऊँ केई चिंता जोग स्वास्थ्य समस्यावां रो सामानो करणो पड सके हैं

.....

000

भ्रष्टाचार निरोधक ब्यूरो-एसीबी उदयपुर रा प्रतापनगर थाणा रा एएसआई सुनील बिश्नोई ने एक लाख रिप्यां री घूस लेवता गिरफ्तार करी ज्यो हैं एसीबी रा अतिरिक्त एसपी अनन्तकुमार बतायो के आरोपी आ रकम दुष्कर्म री कोशिश अर छेड़छाड़ रा मामला मांय मुकदमो दर्ज नी करण री एवज मांय मांगी हीं

000

बालोतरा कने आज एक सड़क हादस मांय तीन लोगां री मौत व्हे गयीं दुर्घटना भारत माला एक्सप्रेस-वे माथे व्हीं जिला पुलिस अधीक्षक रमेश बतायो के एक तेज रफ्तार कार रे बेकाबू व्हे र पलट जावण ऊँ उण मांय सवार तीन लोगां मौका माथे दम तोड दियो, वटे ई तीन दूजा गहरा घायल व्हे ग्यां अ लोग गुजरात रा बनासकांठा जिला रा धानेरा गांव रा रहवासी बताया जावें उठिने अजमेर-बीकानेर राष्ट्रीय राजमार्ग 58 माथे नागौर जिला रा चकढाणी मांय एक कार अर रोडवेज बस री टक्कर व्हे गयी जिण मांय चार लोगां री मौत व्हे गयी अर चार गहरा घायल व्हे ग्यां उठिने पाली जिला रा देसूरी हलकां मांय घांडेराव गांव मांय दूषित भोजन काम मांय लेवण ऊँ ग्यारह लोगां री तबियत बिगड़ गयीं वां रो सामुदायिक स्वास्थ्य केन्द्र मांय इलाज करायो जावें

000

राज्य मांय लारला हफ्ता ऊँ मौसम मांय चाल रह्यो उतार चढाव अर बदलाव रे बीचे गर्मी रो असर फेरू तेज होवण लाग्यो हैं मौसम महकमो आवता 2-3 दिनां मांय तापमान मांय और बढवार अर हीटवेव रो असर रहवण रा आसार जताया हैं महकमो आज ई आठ जिलां मांय लू रो यलो अलर्ट काड्यो हैं दिन अर रात रा तापमान मांय उछाल आवण री आस हैं आथूणी अर अगूणी आथूणी जिला मांय लू रो सब ऊँ बत्ती असर देख्यो जावें ई बीचे बीकानेर, चूरू, बाडमेर अर जैसलमेर मांय करडी गर्मी रो दौर बण्योडो है अर रात मांय ई घणी गर्मी दर्ज करी जावें वटे ई करौली मांय आज दिन रो तापमान 45 डिग्री सेल्सियस रे पार नापी ज्यो

000